

## **Lejimi i përkohshëm**

### **Neni 157**

Regjimi i lejimit të përkohshëm bën të mundur përdorimin në territorin doganor të Republikës së Shqipërisë, me përjashtim të plotë ose të pjesshëm nga detyrimet e importit dhe pa iu nënshtuar masave të politikave tregtare, të mallrave jo shqiptare të destinuara për t'u riekportuar, pa pësuar ndryshime, përveç zhvleftësimit normal për shkak të përdorimit të tyre.

### **Neni 158**

Autorizimi për lejimin e përkohshëm lëshohet në bazë të kërkesës së personit që i përdor mallrat ose që bën të mundur përdorimin e tyre.

### **Neni 159**

1. Autoritetet doganore refuzojnë lëshimin e autorizimit për përdorim të regjimit të lejimit të përkohshëm, në rast se është e pamundur të sigurohet identifikimi i mallrave të importuara.

2. Megjithatë, autoritetet doganore mund të autorizojnë përdorimin e regjimit të lejimit të përkohshëm pa siguruar identifikimin e mallrave, atëherë kur, duke marrë parasysh llojin e mallrave ose natyrën e

74

operacioneve që duhet të kryhen, mungesa e masave të identifikimit nuk sjell si pasojë asnjë formë abuzimi të regjimit në fjalë.

### **Neni 160**

1. Autoritetet doganore përcaktojnë afatin brenda të cilit mallrat e importit duhet të riekportohen ose t'u caktohet një destinacion i ri doganor. Ky afat duhet të zgjasë për aq kohë sa të arrihet qëllimi për të cilin është lëshuar autorizimi.

2. Pa rënë ndesh me afatet e veçanta të përcaktuara sipas nenit 161, afati gjatë të cilit mallrat mund të qëndrojnë nën regjimin e lejimit të përkohshëm, është 12 muaj. Autoritetet doganore, në bazë të një kërkesë të arsyetuar mire të personit të interesuar, mund të zgjasin afatin e përmendur në paragrafin 1 për një maksimum prej 12 muajsh të tjerë, me qëllim që të bëhet i mundur përdorimi i autorizuar.

3. Megjithatë, për rrethana të veçanta, autoritetet doganore mund të përcaktojnë, brenda kufijsh kohore të arsyeshëm, afate më të shkurtra duke marrë pëlqimin e personit të interesuar.

### **Neni 161**

Rastet dhe kushtet e veçanta në të cilat mund të përdoret regjimi i lejimit të përkohshëm me përjashtim të plotë nga detyrimet e importit, përcaktohen në aktet nënligjore në zbatim të këtij Kodi.

### **Neni 162**

1. Përdorimi i regjimit të lejimit të përkohshëm me përjashtim të pjesshëm nga detyrimet e importit jepet për mallrat të cilat, ndërsa mbeten në pronësi të një personi të vendosur në një vend të huaj, nuk mbulohen nga dispozitat e nenit 161 ose, edhe pse mbulohen nga këto dispozita, nuk i plotësojnë të gjitha kushtet e parashikuara nga ky nen për dhënien e regjimit të lejimit të përkohshëm me përjashtim të plotë nga detyrimet e importit.
2. Lista e mallrave, në lidhje me të cilat mund të mos përdoret regjimi i lejimit të përkohshëm me përjashtim të pjesshëm nga detyrimet e importit, përcaktohet në aktet nënligjore në zbatim të këtij Kodi.

#### Neni 163

75

1. Shuma e detyrimeve të importit që duhet paguar për mallrat e vendosura nën regjimin e lejimit të përkohshëm me përjashtim të pjesshëm nga detyrimet e importit caktohet në masën 3% të shumës së detyrimeve që duhet paguar për mallrat në fjalë. Kjo shumë prej 3% zbatohet për çdo muaj ose pjesë të muajit, gjatë të cilit mallrat janë vendosur nën regjimin e lejimit të përkohshëm me përjashtim të pjesshëm, sikur këto mallra të ishin vendosur në qarkullim të lirë në datën në të cilën u vendosen nën regjimin e lejimit të përkohshëm.
2. Shuma e detyrimeve të importit që duhet të paguhet nuk duhet të kapërcejë atë shumë që do të ishte kërkuar nëse mallrat në fjalë do të ishin vendosur në qarkullim të lirë në datën që ato u vendosen nën regjimin e lejimit të përkohshëm, duke mos llogaritur interesat që mund të zbatoheshin.
3. Transferimi i të drejtave e i detyrimeve që rrjedhin nga regjimi i lejimit të përkohshëm sipas nenit 113, nuk nënkupton se duhet të zbatohen të njëjtat masa përjashtimi për secilën nga periudhat e përdorimit që duhen marrë parasysh.
4. Kur transferimi i përmendur në paragrafin 3 bëhet me përjashtim të pjesshëm për të dy personat e autorizuar për përdorimin e regjimit gjatë të njëjtit muaj, mbajtësi i autorizimit fillestar është i detyruar të paguajë shumën e detyrimeve të importit që duhen paguar për të gjithë muajin.

#### Neni 164

1. Kur lind një borxh doganor që ka të bëjë me mallra të importuara, shuma e këtij borxhi përcaktohet në bazë të elementëve të taksimit në fuqi për këto mallra në datën e pranimit të deklaratës për vendosjen e tyre nën regjimin e lejimit të përkohshëm. Megjithatë, në rastet e parashikuara nga dispozitat e nenit 161, shuma e borxhit përcaktohet në bazë të elementëve të taksimit në fuqi për mallrat në fjalë në datën e përmendur në nenin 229.
2. Kur, për një arsye të ndryshme nga vendosja e mallrave nën regjimin e lejimit të përkohshëm me përjashtim të pjesshëm nga detyrimet e importit,

lind një borxh doganor për mallrat e vendosura nën regjimin në fjalë, shuma e këtij borxhi është e barabartë me diferencën midis shumës së detyrimeve të llogaritura sipas paragrafit 1 dhe shumës së detyrimeve që duhet paguar sipas nenit 163.